

*Tin basta inversionista interesa*

# GOBIERNO LO BAY HABRI BETA Y EAGLE BEACH HOTEL

ORANJESTAD(AAN) -- Ministro Tico Croes, durante e conferencia di prensa rutinario di Gobierno, a duna di conoce cu pa fin di aña, Gobierno lo haya un bista cla ariba e situacion di e dos hotelnan esta Beta y Eagle Beach

El a indica cu Gobierno a caba di soluciona e problema di financiamiento pa Radisson, cu ta den un

situacion financiero malo.

## TIN HOPI INTERES PA COMPRA DI BETA Y EAGLE BEACH

Ministro Croes a indica cu Gobierno ta den un proceso basta avanza pa loke ta trata Beta Hotel y Eagle Beach.

Ta asina cu tin diferente grupo interesa den e hotel aki. Ministro Croes a splica cu tin puntonan cu e gru-

ponan mester cumpli cune y tambe mester cumpli cu e deseo di Gobierno esta cu mester bin cu hotelnan di 5 strea cu tin un mercadeo special cu no ta bay come di e mercado actual.

Di parti di prensa a worde puntra si Gobierno ta tene na cuenta e consehonan di SdU esta pa stop cu e proyectonan aki ya cu nan por causa consecucionan grave.

Segun Ministro Croes, ta hustamente teniendo e consehonan di SdU na cuenta, Gobierno ta pensando den e direccion aki.

Gobierno a scucha opinion di SdU y mira ariba kico esaki ta basa. Gobierno su punto di bista ta cu e no ta compart e rapport Maduro presenta pa SdU pasobra e cifranan menciona den e rapport no ta cuadra cu e proyeccionnan cu Gobierno tin.

## TIN HOPI ARUBIANO NA HULANDA CU KIER BIN ARUBA

Gobierno tambe ta tene cuenta cu e realidad, Gobierno a opta pa mira si por finalisa e hotelnan. Ministro Croes a sigui bisa cu e Gobierno anterior a hiba un mal maneho caminda envez di percura cu nos yiunan di tera ta haya trabao, a habri porta pa extranheronan drenta na gran escala. Esaki a causa e situacion actual na Aruba.

Ta spera cu hopi ambtenaar lo haci uso di e lumpsum, mientras cu for di Hulanda 70 % di e 17 Mil Arubianonan kier regresa Aruba pa asina yena e cuponan di trabao cu ta disponible. Tin un grupo grandi di hende muher cu kier traha y un grupo grandi di estudiante cu anualmente ta caba

school y kier drenta den e proceso laboral. Pesey mester tene debito cuenta cu esakinan den nos economia.

## SI HABRI E HOTELNAN LO TIN MENOS EXTRANHERO NA ARUBA

Promer Ministro Eman a enfatisa cu Gobierno ta bay habri e dos hotelnan ey bao condicionnan di Gobierno.

Eman a sigui bisa cu e balans total lo ta menos extranhero na Aruba pasobra maneho di Gobierno lo bay ta dirigi ariba dje.

Eman a bisa cu ta bon pa pueblo no lubida cu e Gobierno anterior a comete un crimen cu comunidad. Gabinete Eman I a traha e proyectonan ey pa nos hendenan bin bek Aruba pero e Gobierno anterior a keda sin haci esaki y a habri porta pa extranheronan drenta e pais.

## HABITANTE A DUNA INTRUSO ALGUN WANTA

ORANJESTAD (AAN): Tabata algo pasa di mey anochi cu habitante den Grootstraat a pidi asistencia di Polis. Ta parce segun e prome informe cu doño di cas a captura un ladron.

Patruxa a primi trot pa asina yega rapido den e caya menciona.

E caballero di inicial L.C. a declara na e patruxa cu el a descubri un homber den su cura di cas. Pa por a para e supuesto intencion di e homber, e doño di cas a pase algun wanta. Aparentemente e wanta lo a paraliza e homber di inicial J.R.Y.

Segun declaracion corto di e joven di 20 aña, cu el a

drenta den e cura pa bebe un "Boca di Awa".

Polis a transporte pa Warda di Polis na unda lo sigui cu e investigacion.

## YUDA CUIDADANO HAYA SU 900 FLORIN BACK

ORANJESTAD (AAN): Den vecindario di Lee Feng (antes Casa Chieuw) den Caya Betico Croes, un ciudadano a perde como 900 Florin.

E placa aki a ser perdi entre Lee Feng cu Marathon Electronics.

Cualquier persona cu por a haya e placa aki, por yama 23449 y lo tin un recompensa. E placa aki ta pa tratamiento medico den exterior.

Tambe por pasa na Warda di Polis.

## CE N'EST PAS MOI !!!

